

## *È y é des tchoses que rev'niant aidé*

### *Envèllrie d'c'és qu'sont pairtis*

*Le Bon Pasteur é aiyu bin di mâ aivos ses berbis. L'pu s'vent è n'sont pe aigieres, c'ât c'ment enne rote de dgens qu'cheuyant cés qu'faint di bru sains s'musaie poquoi ne voué çoli moune.ç'ât dînche qu'in bé maitin le Bon Due s'engraingné taint qu'è trové in moyin po y faire è compare en ces sottès bêtes de dgens, qu'çoli n'saivait pu dînche allaie. È musé a déyudge po faire è meuri les pu croyes, mains, c'ment el était bon è qu'è y en aivait qu'étint ai po pré daidroit è pregnié ses précâchions po les sâvaie. Feut dit, feut fait, mains vos saites, aipré quéques temps les métchainetès è les ertieulons r'ècmencennent pé qu'devaint. Impôssibye d'être fréra è soeuratte, aidé çoli r'venyait, les dyières è tot çoli aivo cés qu'v'lant tot commaindaie, vos voitès qu'c'était c'ment adjdheû !ç'ât en si môment-li qu'mon r'conte se pèsse, écoutaites :*

*C'était l'herbâ, lai neue airrivait, de fines brussales tieuvrint les tchaimps. Le soreil se coutchait dains des violats yeussues mairquais de djâne tot çiaile qu'faisait musaie en lai moue. Lai neue aippeurtchait foue, le djo s'en allait f'saint è musaie en lai moue tot simpyement, mains po tiu ?*

*Chu lai vie in veye paiysain s'en reveniait contre Môtie dâ Chaindon. El était allaie en lai foire po épreuvaie*

*d'vendre in poure veye tchevâ que l'cheuyait, tirie â bout d'enne côrde. Loues poisaines péssaies résouennint chu lai vie. Craibin qu'l'hanne était demoérait tra longtemps â cabaret, è r'nondait, djurait, engraingnie de n'aivois saiyu vendre son véye tchevâ. Ah l'véye rigat ! Lai pouere bête, eusaie pai l'traivaiye, soètche è bos sembyait répondre aivos le brut de ses sabats chu lai route métchaint, métchaint.*

*Lai bête que l'paiysain forçait è mairtchie pu vite n'aivait pu d'çioçe è chuait. Ses échas se soyevint di temps que ses minces nairis s'euvrint po r'pare de l'air. Pouere tchevâ è n'était pe bin loin de lai moue que v'lait bintôt v'ni y bèyie tçhittaince de sai londge vétçhiance de traivaiye dos les cops è les djurons.*

*Tiain i s'errâtait les menaices è lai rieme le faisint r'pairti è ses sabats diyint otçhe c'ment lai moue, lai moue !*

*Tot d'in cop voili qu'in bossuat noi l'hanne se tréjé dâ drie in botchèt aivos in malicious è grimaiçaint chorire. È tapé chu l'épale di voyaidjou de neu qu's'airrâté tot bais, che épaiyurie qu'el v'nié aich biaive que lai yünne dains l'cie ! Le tchevâ heuné de djoue, c'ment se l'noi l'hanne v'lait l'savait.*

*-Bin l'bonsoi braive hanne. Dié l'bossuat*

*- Bin l'bonsoi réponjé le paiysain que grulait d'paiyu.*

*I ai brament mairtchie dié l'bossuat, i seus sôle mains i n'seus pe â bout di tchemin. I ai vu bin des tchôses mains ce n'ât pe ainco tot.*

*-Eh bin è te fât aitchetaie mon tchevâ, dié l'paiysain en échpérainc ainco diaignie ço qu'el aivait manquaie à mairtchie és tchevâs.*

*-Ce n'ât pe lai poine, réponjé l'mychtérieux noi l'hanne. Demain tai bête veut meuri. Ailose me djeute de montaie dchu po m'eurposaie in pô. I vais djeuqu'â preutchain v'laidge. Çâ dînche qu'en ont poyu vois dos lai yüne dous hannes è in tchevâ qu'aivaincînt sains ran dire. Le paiysain éprouvait bin de r'laincie son tchvâ aivo des hue Cocotte di temps que l'noi l'hanne ne diait mot.*

*Airrivaie è Chalières, è s'râtennent. Le bossuat déchendé di tchvevâ, bèyé enne petéte aimialaie en lai Cocotte è tçhité l'paiysain en l'eurmerchiaint è peu s'peurgé dains lai neu. Tot de meinme, dînche enne sôrte d'hanne, le paiysain en était tot terbi tiaind el airrivé en l'hôtâ. Tiaind è voyé fairé péssaie lai pôrte de l'étâle voili qu'lai Cocotte aivait l'œil éteint, les nairis frais, i grulait, saté in pté cop è tchoyé moue devaint lai porte c'ment l'noi l'hanne l'aivait dit. L'épaiyurie paisain r'conté en ses dgens ço qu'était airrivaie en diaint qu'c'était lai fâte en ci bossuat que son tchevâ était tchoi cravè.*

*Dous-tros djos pu taid, in duemoine lai vépraie les dgend di paiys s'tegnînt en lai fois dos l'gros tia di v'laidge. Les djuenes baichattes è les djuenes hannes aivînt lai doberie en tête, les hannes djasîns aiffaires è les fannes... è y en aivait bin quequ'ennes, probabyement qu'les âtres étînt ainco è r'laivait aipré noune ! Not' paiysain voyé tot d'in cop l'bossuat d'lai*

*neu voué son tchevâ était cravaie. Aivô sai cainne è totchait c'té- ci ç'tu-li pe tirait de l'aivaint. El aivait de ruyégeaints l'oeils, in peu tchouéré, èl ch'couait sai bosse en mairtchant d'lai sen di paiysain tot étrulaie.*

*-I seus lai pèche, t'é aiyu crouye è métchaint daivôs ton véye tchevâ, c'ât po çoli qu'i l'ait fait meuri. Toi, i veus quand meinme te léchie en vie poch' qu'te m'é rendu seurvice. I vais être pait. En n'l'ont pu r'vu dains l'pays mains bin des dgens sont meuris, des djuenes, des véyes, des hannes, des fannes. Tchetché ménaidge aivait ün, craibin dous moues. Tot cés que l'bâton aivait totchi meurint dous-tros djos pu taid. È péssé è Bellelay, en lai Montaigne, è Sint Ochanne, en Aidjoue, dains l'Vâ. È fayu meinme régrossir les ceumtieres, c'était enne crouye vétçhaince piene de paiyus, de misère è de moues. C'ât dâ ci mômement-li qu'les sois de Tôssaint en peut voit des aimboiyes venis pai les vies po demaindaie des praiyieres. C'ât po çoli qu'dains les véyes ménaidges en trove ainco de labnéte è di bouecha. Tchie les pu djuenes en ne crait pu en de tâles hichtoires, en épreuve de pare tot çoli che en lai ruse qu'en ne vois pé pe que d'âtres sôrtes de pèches trinnant è qu'è faint aitôt des moues. Les temps tchaindgeant, les dgens demoérant ço qu'è sont aidé aiyu, bon è crouye en lai fois.*

*Dinche vait lai vétçhaince, dinche vait l'monde è son hichtoire.*